

لُوقا 23:32-56

32 فوجي بي بيڄي ڏوهي منڪون ني پريو يسوع پيڙا مارڻ ري شارو لي جاوتا پڙيا. 33 جڏي او اوني جگها تي ڀڳا جڪي رو نون ”ڪوپڙي“ هتوم تو اوڻ اوڻون پريو يسوع هان اوڻون بيئون ڏوهاريون ني آپري آپري شولي تي چاڙهي ڪوڪا هڻيا. هيڪ پريو يسوع ري شاجي هان پيڄو ڪاپي پاشي هتو. 34 پيڄي پريو يسوع ڪهيو ڪم ”اي پٽام ايئون ني معاف ڪم ڪيونڪه اي شمجھتا ڪونهي ڪم مهني ڪي ڪرون پڙيا.“ پيڄي فوجي پريو يسوع را گاپا آيت ۾ بلاوڻ ري شارو ڀڳا گھائڻ لاگا. 35 اوڻ تموم گھڻا منڪ ابي جوتا پڙيا هان يهودي سردار پي نئولي ڪري ڪيتا ڪم ”اي تو پيڄون ني بچاوتوم همي جي اي ايشور رو چونديوڙو مسيح هي، تو آبرو آپني بچاوي.“ 36 فوجي پي پريو يسوع تي نئولي ڪرڻ لاگا هان اوڻون پريو يسوع ني انگورون رو ڪتو رس ڏي ڪهيو ڪم 37 ”جي تو يهوديون رو بادشاهه هي، تو آپني بچا.“ 38 اوڻون پريو يسوع ري شولي مائي هيڪ تڪي لگائي جڪي تي لڪيوڙو هتو ڪم ”اي يهوديون رو بادشاهه هي.“ 39 پيڄي جڪو ڏوهاري پريو يسوع پيڙا شولي تي چاڙهيوڙا هتا اوڻون ۾ هيڪي مهيو ڏي پريو يسوع ني ڪهيو ڪم ”ڪي تو مسيح ڪونهي؟ تو پيڄي تو بچ هان مهوني پي بچا.“ 40 ايئي تي پيڄي ڏوهاري ڌڙڪو ڏي ڪهيو ڪم ”ڪي تني آجون پي ايشور رو بي ڪونهي؟ تني پي شاگي سزا ملي هي. 41 آجون ني تو ضرور سزا ملڻ ڪي، ڪيونڪه آجون تو ڏوه ڪيئا هي هان اوڻون رو بدلو ملي پڙيوم پڻ ايئي تو ڪو پي ڏوه ڪونهي ڪيئو.“ 42 پيڄي اوڻي پريو يسوع ني ڪهيو ڪم ”اي يسوع، جڏي تي بادشاهه هوئي آئو، تو مهني ضرور ياد راکيا.“ 43 پريو يسوع اوڻي ني ڪهيو ڪم ”هون تني شاجي ڪونه هون ڪم تو آج ئي مهني پيڙو شرگ ۾ هوئي.“

پريو يسوع ري موت

44 ڏن رو اندازن ٻارهون شون لي تيني بچي توڻي شجي ملڪ ۾ اندارو هوئي گيو. 45 ڪيونڪه شورج رو اڃاڻو ختم هوئي گيو هتو. پيڄي ايشور ري گهر رو پويتر جگها آڻو پڙدوم بچ شون قاتي بي حصا هوئي گيو. 46 پيڄي پريو يسوع زور شون رڙ ڪري ڪهيو ڪم ”اي پٽام هون آپري آتما تاري هات ۾ ڏيئون هون.“ اترو ڪي دم ڏينو. 47 جڏي صوبيدار شجو ڪئين ڏينوم تو ايشور ري ٻڌائي ڪري ڪيوڻ لاگو ڪم ”بيشڪ اي هيڪ نيڪ منڪ هتو.“ 48 جڪو منڪ اوڻ آيوڙا هتام اي شجو جوئي چاتي بيتتا آپري گهرون ڏيشا پاچا گيا. 49 پڻ او شجائي منڪ جڪو پريو يسوع ني اولڪتام او الگي پون شون اي شجو ڪئين آپري اونڪيون شون ڏيڪتا پڙيا. اوڻون شون نال او لگائي پي هتي جڪو گليل صوبي شون پريو يسوع پيڙي آيوڙي هتي. 50 اوڻ هيڪ نيڪ هان پلو منڪ هتو. اوڻي رو نون يوسف هتو هان او درمي پنچائيت رو ميمبر هتو. 51 او پنچائيت ري انصاف هان ڪوم شون خوش ڪونهي هتو. او يهوديا صوبي ري شهر ارميتيا رو ريوڻ آڻو هتو هان او ايشور ري بادشاهي ري انتظار ۾ هتو. 52 اوڻي پلاطس ڪڍي جائي پريو يسوع رو لاش مونگيو. 53 پيڄي اوڻي جائي پريو يسوع رو لاش شولي شون اُتاريو هان اوڻي ني قيمتي شوني گايي ۾ بيڙهي هيڪي مڪوم ۾ راکيوم جڪو

هيڪي جبل ري چُر ۾ ناهيوڙو هتو. اُوئي مُڪوم ۾ پيل ڪيني پي ڪونهي راکيو هتو. 54 او پوٽر ڏن رو تباري رو ڏن هتو هان پوٽر ڏن شروع هوڻ آلو هتو. 55 پچي او لڳائي جڪو پريو يسوع پيڙي گليل صوبي شون آئي هتي، او پي يوسف لاري گئي. اوئون جائي مُڪوم ني ڏينو ڪه پريو يسوع رو لاش ڪيڪر راکيو هي. 56 پچي پاچي گهري جائي پريو يسوع ري لاش ري سارو شري شيون هان عطر ناهيو. پچي اوئون ايشور ري حڪم تي پوٽر ڏن رو آروم ڪيو.

پريو يسوع رو جي اُنڻ (متي 15:1-28)

1 پوٽر ڏن شون پچي، آچر ري ڏن، ساڪلي تارهي مريم مگدليني هان بيچي مريم مُڪوم جوڻ گئي. 2 تو اوچتو زلزلو آيو، ڪيونڪه پرميشور رو هيڪ فريشتو آڪاش شون اُتريو هان آئي مُڪوم ري موڏي تي راکيوڙي پتر ني هتائي آپ اُوئي تي پيشي رهيو. 3 او فريشتو آڪاشي بجلي آلي ڪار چمڪنو پريو هان اُوئي را گايا آچا ڏوڏ جهڙا هتا. 4 پهريدار پي ۾ ڏڪڻ لاگا هان او موٽرون آلي ڪار هينا ڪريا. 5 اُوئي فريشتي لڳيون ني ڪهيو ڪه، ”تي ني بيناجو. مهني خبر هي ڪه تي پريو يسوع ني جوڻو هوم، جڪي ني شولي تي چاهيو هتو. 6 او ايت ڪونهي هي، پڻ جون اُوئي ڪهيو هتو، او جيتو هويو رو. آتو، او جگها تي آپ جوڻو، جيت اُوئي رو لاش راکيوڙو هتو. 7 همي چيڪي جائو هان جائي اُوئي ري چيلون ني سٿائو ڪه، ’او موٽرون شون جيتو هويو هي هان تون شون پيل گليل صوبي ڏيشا جاوي پڙيو. تي اوت اُوئي ني ڏيڪشو.‘ مهني توني شجي بات سٿائي ري، اي ني پونتريا.“ 8 او لڳائي پيل تو بيناجي، پڻ پچي تموم گهڻي خوش هوئي. پچي او اوت شون چيڪي نڪري هان پريو يسوع ري چيلون ني سٿائو ري سارو ناشتي گئي. 9 اوچتو مارگ ۾ پريو يسوع اوئون ني پيڙو هويو هان ڪهيو ڪه، ”نمسڪار.“ ايئي تي او لڳائي اُوئي ڪيدي آئي هان اُوئي ري پگون ۾ ڪري اُوئي آگهي آپرا شيش نمايا. 10 پريو يسوع اوئون ني ڪهيو ڪه، ”بيناجو ني، پڻ جائي مهاري چيلون ني ڪو ڪه او گليل صوبي ڏيشا جاوي هان او مهني اوت ڏيڪشي.“

پهريدارون رو يهودي اڱوڻون ني سٿائو

11 جڏي او لڳائي پاچي جاوتي پڙي، تو مُڪوم تي پهرو ڏيوڻ آتون ۾ ڪئينڪه منڪ شهر ڏيشا گيا هان ايشور ري موٽي پوجاريون ني شجي بات سٿائي. 12 ايئي تي ايشور ري موٽي پوجاريون هان يهودي اڱوڻون ملي آبت ۾ صلاح ڪي. پچي اوئون پهريدارون ني تموم گهڻي رشوت ڏيني 13 هان اوئون ني شيڪايا ڪه او منڪون ني ايئون ڪي ڪه، ”جڏي مهني رات رو اونگ ۾ هتا، تو يسوع را چيلا آيا هان اُوئي رو لاش چوري ڪري لي گيا.“ 14 اوئون پهريدارون ني دلجا ڏي ڪهيو ڪه، ”جي اي بات گورنر توڻي پڳي، تو مهني هاڻي اُوئي ني سمجهاشون.“ 15 پچي پهريدارون رشوت لي ايئوج ڪيو جون اوئون ني شيڪايوڙو هتو. اي بات اُوئي ڏن شون لي آج توڻي يهودي قوم ۾ مشهور هي.

ياد ڪرڻ رو وچن (1 - پطرس 3:18)

مسيح آڻي پاپون ري معافي ري سارو هيڪ گهمرو ڏڪ ڏينا ڪه آپون ني ايشور ڪيدي لي جاوي.

او نيڪ هتو پڻ پاپون ري ڪري سرير ۾ تو ماريو گيو، پڻ آتما ۾ پڙي جيتو هويو.